



Bentiaraq Ottosen

UPA 2026/30-1

Atassut

23. April 2026

**Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip allanngortinneqarneri pillugit inatsit (Pisortani sulisunut kissaatigineqanngitsumik, innarliisumik pinerluutinngortinneqarnera, pinerluutinngortinneqarnerat, nikanarsaasumillu inuit pissusilersornerup atornerlunneqarnerisa kinguaassiuutinut tunngasumik atortussat innarliissutaasut akiorniarlugit suliniutit patajaallisarneqarnerat, pineqaatissiinerup aalajangersarneqarnerani pissutsit sukannerulerersitsisut, toqutsisutut eqqartuussaasimasut immikkoortortaqarfimmi matoqqasumi pineqaatissinneqarnermik naammassineqarnissaannut inissinneqartarnerat il.il.) pillugu siunnersuutip Kalaallit Nunaanni Namminersorlutik Oqartussanit akuersissutigineqarnissaa pillugu Inatsisartut aalajangiiffigisassaattut siunnersuut.**

(Meeqqanut, Inuusuttunut, Inatsisit Atuutinneqarnerannut Naligiissitaanermullu Naalakkersuisoq)

Pineqaatissiisarneq sakkukippallaaqaaq, iliuseqartariaqarpugut!

Atassummiit Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermik inatsisip sukaterneqarnissaa kissaatigaarput. Pingaartuuvoq meerartavut inuusuttortavullu illersorneqarnissaat aamma kinguaasiutitigut kanngutaatsuliorfigineqarsimasut sakkortuumik illersorneqarnissaat pingaartitaraarput.

Nunatsinni pinerluttulerinermut inatsiseqarpugut, kisianni ukiuni makkunani inuiattut nammineerneruleriartornitsinni malinnaasinnaajunnaarsimasoq. Inatsisit ilaatigut periutsinik eqqunneqarsimasunik tunngaveqarpugut, ullutsinnut naleqqukkunnaarsimasunik. Taamaattumik pisariaqarpoq ingerlaqqilluta nutarterisariaqarnerput, taamaalilluni Kalaallit Nunaanni eqqartuussisarnermi inatsit pinerluttulerinermullu inatsit pinerluffigineqarsimasunut pitsaasumik sinaakkuteqarlunilu malunnaatilimmik kinguneqarsinnaaqqullugu

Akuersaarneqarsinnaanngilluinnarpoq meerartatsinnut kinguaasiutitigut kanngutaatsuliorneq, soorunalimi aamma kikkunnulluunniit kinguaasiutitigut kanngutaatsuliorneq. Taamaattumik sukangasuumik inatsimmik atuutitsilersitsinikkut inuk kinguaasiutitigut kanngutaatsuliorfigineqarsimasoq illersorneqarnissaa qulakkeerneqartariaqarpoq. Eqqarsaatigineqarsinnaasummi ilagaat, assersuutigalugu, kanngutaatsuliorsimasoq illoqarfigisami imaluuniit nunaqarfigisami najugaqarsinnaasooq, taamaalillunilu pineqartoq takoqqinneqartuartariaqartarluni.

Atassummiit ersarissumik pinerluttulerinermut tunngatillugu politikkeqarpugut. Toqqissisimanissarput anguniarlugu sinaakkutinik inuk qitiutillugu pilersitsisariaqarpugut, tassanilu



pinerluffigineqarsimasut aamma taakkua avatangiisaat illersorneqarnissaat ilanngullugit eqqarsaatigineqartariaqarpoq. Atassummiit oqariatuutigiuarparput pillaasarnermut inatsit nunatsinnut eqqunneqartariaqartoq. Inuiaqatigiit ikittunnguugaluarluta pisariaqalersimavoq, inuiaqatigiillu kissaateqarnerat naapertorlugu allannguinnissarput. Amerlasuutigut pineqaatissiisarnarit sakkukippallaartutut isigineqartarput.

Atassummiit anguniarparput Nunatsinni pillaasarnermut inatsit eqqunneqarnissaata saniatigut, peqqinnissaq pillugu inatsimmi aamma Nunatsinni parnaarussiveqarnermut tunngasut pillugit inatsimmi, peqqinnissamut tunngasutigut suliarineqassasoq, Nunatsinni kinguaasiutitigut atornerluisimasut pillugit nakorsaatit atorlugit kinguaasiorsinnaajunnaarsitsisarneq eqqunneqartariaqartoq. Tamatuma saniatigut pingaaruteqarpoq tamanna Nunatsinni eqqartuussisarnermik inatsisikkut aalajangersarneqarnissaa, taamaalilluni eqqartuussiviit aalajangiisinnaaqqullugit.

Atassummiit oqarpugut nakorsaatit atorlugit kinguaasiorsinnaajunnaarsitsineq atuuttariaqartoq. Ukiukitsunut kinguaasiutitigut kanngutaatsuliorsimasut inuiaqatigiinnut akuleruteqqinniarnarat annertunerujussuarmik piunasaqaateqarfiusariaqarpoq. Taamaattumik katsorsartinnerup saniatigut nakorsaatit atorlugit kinguaasiorsinnaajunnaarsitsineq piunasaqaataasariaqarpoq. Akissaqanngilagummi siunissami meerartatta taamatut eqqugaallutik tarnikkut kingunerluuteqartarannut iliuuseqanngiinnarnissatsinnut.

Politikkikkut oqartuarpugut meerartagut illersortariaqarlugit. Taamaattoqarsinnaavorli aatsaat inuit kinguaasiutitigut atornerluisimasut sukannernerusumik pineqaatissinneqartalerpata. Inersimasoq meeqqanut atoqatigiinnikkut kajumissuseqartoq uteqqiasumik pinerluuteqarsinnaanissaata ilimanaateqarnera annertuujuvoq. Taamaattumik uteqqillara, nakorsaatit atorlugit kinguaasiorsinnaajunnaarsitsineq (medicinsk kastration) nunatsinni atuutinneqartariaqarpoq.

Kalaallit Nunaanni pinerluttulerinermut inatsisip aamma eqqartuussisarnermik inatsisip allanngortinneqarnissaannut kissaativut annertuut tassaniipput, meerartatta innuttaasullu illersorneqarnissaat aammalu pinaveersaartitsineq qulakkeerneqarnissaat anguniarlugu.

Politikkikkut sulinermi pisimasunik ataasiakkaanik eqqartuussisutut nalilersuineq pinnagu, pingaaruteqarpoq inatsisitigut sinaakkutit aalajangersarneqarnissaat. Nunatsinnili pinerluuteqarnerit ilaat pineqaatissiisutaasartut ullumikkut sakkukippallaartutut isigineqarsinnaapput. Eqqungaasut illersorneqarnissaat eqqarsaatigalugu, inuiaqatigiinni pinerluuteqarnerit kinguneqartinneqartarneri ullutsinnut naleqqunnerusariaqalerput. Taamaattumik pillaasarnermut inatsit nunatsinni eqqunneqartariaqarpoq, pinerluuteqarnerit malunnaatilimmik kinguneqartinneqartariaqarmata

Kingaasiutitigut atornerluisimasut ilaatigut ukiup affaa imaluuniit ukioq ataaseq sinnerluguluuniit pineqaatissinneqarsinnaasarpoq, tamanna akuerineqarsinnaanngilaq inatsit sukatertariaqarparput



eqqartuuisarnermut inatsisitta saniatigut pillaasarneq nunatsinnut inatsisinngorlugu eqqunneqarpat.

Atassummiit inuiaqatigiit toqqissisimanissaat pingaartipparput, eqqungaasullu illersorneqarnissaat angorusullutigu. Nutarsaaniarneriinaangilaq oqariartuuteqarnerput, inuiaqatigiinnulli naapertuilluarnerusumik ullutsinnut naleqqussakkanik periutsinik atuutsitserusulluta. Taamaattumik pingaaruteqarpoq eqqungaasut sakkortuumik illersorneqarnissaat kiisalu pinerluttunut malunnaatilimmik kinguneqartitsisoqartarnissaa.

Atassummiit neriuppugut oqariartuutigisavut nassuiaatigisavullu tusaaneqarluassasut, aammalu naqissuserumallutigu nakorsaait atorlugit kinguaasiorsinnaajunnaarsitsineq (medicinsk kastraktion) nunatsinni eqqunneqartariaqartoq

Taamatut oqaaseqarluta siunnersuut Naalakkersuisut saqqummiussaap taperserparput, kisianni nunatsinni pillaasarnermut inatsit eqquttariaqalerparput. Qujanaq Inatsisartut Inatsisinut ataatsimiititaliaanut siunnersuut innersuupparput.